

## Mama di Dios òf Yu di Dios?

Nos ta kòrda e storia di Pasku bon: e stal, e pesebre, e angelnan, e wardadónan di karné, e strea, e sábianan, Hosé. Ma ningun ta destaká den e storia manera e mama i e Yu.

**Sin duda e Yu ta e Persona sentral di Pasku.** Ta un echo inkomprensibel ku e Beibi di Bètlehèm ta Dios mes. Ta kasi inkreible ku El a nase pa muri riba e krus di Kalvario pa tuma e kastigu eternu ku abo i ami ta meresé pa nos piká; i si nos bira di nos piká i stòp di konfia tur otro kos (nos religion, nos deboshon, nos bon obranan, èts.) i konfia **Hesus SO**, nos por haña salbashon! Sigur e Yu di Dios ta meresé nos adorashon.

Ma kiko di esun ku a duna lus na Hesus Maria ta “mama di Dios”? Tin dos kontesta pa e pregunta aki.

E doktrina ku Maria ta mama di Dios a originá ku e Konsilio di Efeso na aña 431. Kedu di Kalsedon di aña 451 a bisa: “Nasí di e Birgen Maria, Mama di Dios segun humanidat.” Kiko esei ke men? Nan a usa e lenguahe aki pasobra e sekta nestoriano a siña ku dos persona distinto a uni den Hesus; ku e persona ku a nase di Maria tabata hende so, i **despues** Dios a bin biba den e Hesus humano. Pues, Konsilio di Efeso su meta **no tabata pa eksaltá Maria**, ma pa enfatisá ku e Beibi ku a nase ta **Dios mes!** Den e sintido ei, nos por aseptá ku Maria ta “mama di Dios.”

Ma di otro banda pa yama Maria “mama di Dios” ta blasefemia horroso! Dios semper a eksistí, i e Yu, siendo Dios, tambe a eksistí for di eternidat pasado. Beibel ta ekspresá nèt esaki ora e ta deklará “*Na prinsipio tabata e Palabra, i e Palabra tabata ku Dios, i e Palabra tabata Dios...I e Palabra a bira karni (hende) i a biba meimei di nos...*” (Juan 1:1,14)

E Yu di Dios tabatin Su komienso na momentu ku El a ser konsibí? **Nunka!** Maria a duna lus na Dios? **Apsolutamente nò!** E kurpa humano di Hesus a nase di Maria. Ma siendo Dios e Yu semper a eksistí i no a haña su komienso ora Maria a duna lus! Referiendo na Hesus, Skritura ta deklará: “*Ma abo, Bètlehèm...for di bolo sali Uno pa ta Gobernante na Israel. Su origen ta for di hopi tempu pasá, for di e dianan di etèrnidat*” (Mikeas 5:2). Nò, Maria no tabata mama di Hesus Su divinidat! Alkontrario, Hesus tabata Kreadó di Maria!

Marcus Meyer tin rason: “Dios no tin mama. Dios semper a eksistí. Dios mes ta kreadó di tur kos. Debí ku un mama mester eksistí promé ku su yu, si bo ta papia di ‘mama di Dios’ di e forma ei, bo ta pone un otro persona promé ku Dios. **Pues, bo ta hasi e persona ei Dios...** Maria lo yora pa tende un hende pèrvèrti e bèrdat di e forma ei i yam’è mama di su Kreadó.”

Hesus ta Dios; ma E tambe ta hende. I ta solamente komo hende ku E por tin un mama. Bo por imaginá Maria introdusí Hesus ku e palabranan: ‘Esaki ta Dios, mi Yu?’

Ademas, si bo ta insistí ku Maria ta mama di Dios, anto lògikamente bo ta hañábo obligá pa yama Hosé tata di kriansa di Dios, yama Santiago, Hosé, Simon, i Hudas rumanan di Dios (Mateo 13:55), yama Elisabèt i Juan Boutista famia di Dios (Lukas 1:36), yama Heli welo di Dios (Lukas 3:23), i yama Adam di 59 bisawelo di Dios (Lukas 3:38). Si esei ta blasfemia, anto tambe ta blasfemia pa yama Maria “mama di Dios”!

Meskos ku Hesus no tabatin tata den su naturalesa humano, igualmente E no tabatin mama den su naturalesa divino. Pa yama Maria “mama di Dios” ta peligroso. Nos no mester dun’è e atenshon—i sigur no adorashon—ku Dios so ta meresé. Nos mester tin e mentalidat di e sabionan: “*...nan a tira nan kurpa abou na suela i a ador’E (Hesus). I nan a habri nan tesoronan i a ofres’E (Hesus) regalonan: oro, sensia i mirra.*” (Mateo 2:11)

Klaramente nan a duna Hesus atenshon spesial—no Maria. E Pasku aki—i tur e otro 364 dia di aña—**nos tambe mester dirigí nos atenshon na e Yu di Dios, no e mama.**